

dum, nondum definimus. Alii articulum hunc tollunt; quod improbamus. Alii limbum quendam comminiscuntur, quod damnamus. Alii cum statu exaltationis confundunt; quod miramur. Alii sepulturam intelligunt; quod nondum recipimus. Alii omnis passionis ἀνακεφαλαίωσιν statuunt; quod non videtur convenire cum epitome. Alii ad sensum iræ divinæ referunt; quod non displicet. Alii de triduo & ignominioso mortis dominio accipiunt, quod valdè probabile. Alii denique realem animæ in cruce à corpore separatæ descensum volunt, quod verisimile.

73 *Exaltationis* gradus sunt, Resurrectio, ascensio, sessio ad dextram patris.

74 *Resurrectio* est, quâ morte subactâ seipsum ad vitam æternam divinâ potentiâ suscitavit.

75 *Ascensio* est, quâ eâdem potentiâ verè & visibiliter corpus suum in cœlum beatorum transtulit.

76 *Sessio* ad dextram Dei patris est, quâ plenitudinem tum potestatis tum gloriæ nactus est, & utramq; plenissimè in *illustri* suo *ad judicium adventu* ostendet.

77 Restat tertium opus Dei quod nobis in Symbolo describitur: nimirum *Sanctificatio*.